

17 1617 3995 160 -

REQVESTE

de la France, à son sou-
uerain Roy, pour la li-
berté de son Aduocat
Alludée, à la mort &
surrection du bon La-
zare amy de nostre
Seigneur.



A PARIS,

MDCXVII

REQUESTE DE LA FRANCE,
à son souverain Roy, pour la liberté de son
Advocat Alludée, à la mort & surrection du
bon Lazare, amy de nostre Seigneur.



A Sainte penitente Magdelene non seulement obligée au Lazare, à cause qu'il estoit son frere, mais qu'il estoit amy de nostre Seigneur, en receuant des graces, & que à son exemple & par ses prieres & de sa sœur Marthe, elle recognoissoit auoir receu inspiration & charité enuers nostre Seigneur, voyant ledit Lazare, son frere touché de maladie & iugé rendre à la mort: encores honteuse nes'adresse directement à nostre Seigneur, mais à ses Apostres Princes de nostre foy, pour luy faire sçauoir cette maladie, le supplier qu'il descende à luy & l'empesche de mourir. Nostre Seigneur, remettant à se manifester qu'il auoit pou- uoir non seulement de guarir vn malade, mais faire viure vn homme mort, retarde & arriue voire quatre iours apres sa sepulture, assez tost neant- moins: car receu le salut de la bouche de ceste penitente iugement de sa foy, si eussiez esté icy mon frere vostre amy ne fust mort, mais ie sçay que rien ne vous est desuié de vostre pere incli- nant a son ge le prouisoirement luy dit, ton frere resuscitera & pour la contenter entierement va au tombeau elle non encore abersée de foy luy propose les mauuaises odeurs qu'un corps de qua- tre iours en terre pouuoit rendre, sans croire

qu'il auoit autant de pouuoir de luy faire rendre de bonnes odeurs comme de le faire reuiure. A quoy nostre Seigneur ne s'arrestant fait ouurir le tombeau, & miraculeusement reuiure le Lazare : de laquelle surrection il luy naist vne grande creance louïange & contentement à toute l'assemblée parens & amys dudit Lazare.

Or Souuerain Roy si vous auiez recogneu en vostre France les dueils, les pleurs (ou du moins la quinzième partie) : car aussi est-ce le taux du Roy au denier quinze) de ce qu'elle a paty, soit à cause du detestable parricide de Henry le Grand, que depuis par tant d'occurrences, & par l'arrest de Monseigneur le Prince, & par la force faicte quasi à tous Messieurs vos Princes, Ducs & autres officiers, de s'esloigner d'aupres de vostre Majesté, pour les mauuaises impressions & oppressions de leurs parties formelles qui se rendoient leurs iuges abusants de vostre autorité enfermée sous le seel de leurs persuasions vulpines & leuines, sur le chef desquels vous auez puis peu fait rayonner le Soleil de vostre Iustice, elle ne fust à present aux termes de plaintes.

Reste (SIRE) à vostre pauvre France à present pour la releuer, la tirer de telles obscuritez qu'un rayon de vostre Soleil soit tiré des ombres ausquelles ils ont procuré qu'il fust mis, pour avec la lueur qu'il recevra de vous faire le reste de ces espoisses nuages.

SIRE vostre pauvre France vous supplie ne prendre en mauuaise part sa requeste pour son aduocat non Prince estrange, mais vray François, & de vostre propre sang, en ayant iuste cau-

se, car s'il patit iniustement à son subiect & demeure de vous requerir sa liberté, c'est vn sang si sacré duquel le Ciel est tant jaloux que vostre pauvre peuple ne doubte qu'il ne s'en irrite, & en faire pleuvoir telles vengeances & à telle heure (comme ses secrets sont incogneus) qu'il ne s'en apperceura que trop tard, jointe l'obligatiō qu'il a acquise sur luy lors que tous estant dans les enchantements de celuy, qui a esté touché par vostre iustice, il a beaucoup de fois crié à tous comme à son iuge, ne l'avez sçeu oïir, tant qu'il luy restoit ce semble à dresser ses vœux au Ciel, n'eust esté l'entremise d'iceluy vostre proche Monseigneur le Prince comme plus fauory de vous qui l'ayant embrassé se rendit porteur de ses plainctes à vos beneuoles oreilles pour empescher sa totalle ruine manacee par tant d'oppressions, si bien que l'encre ne peut empescher qu'il n'obtint de vostre bienueillance le remede proposé, & plus singulier, vne conuocatiō d'estats pour reigler cinq principaux poincts.

Que Messieurs du Clergé ne fussēt taxés, pour chacun cloché que à vingt sols de decimes, afin que le reuenu consommé en gros decimes & frais, fust employé à executer l'intētion des fondateurs sans la violer, le surplus s'il y en auoit employé à l'entretienement des pauvres, erudition de la ieunesse aux lettres & arts comme seminaires de la republique, & à la descharge des tailles.

Que la venalité des offices cessast.

Que aux gouuernemens & charges fust preferée la noblesse Françoisē, comme celle qui le plus souuent prodigue & son biē & son sang à la

manutention del'Estat.

Que l'effrené nombre d'officiers à gages & foule du peuple fut leué.

Que les daces imposees sur le vin, bled, sel, bestail & autres marchandises fussent ostées, & le traffic permis sans aucune chose payer comme il estoit anciennemēt, afin de faire cesser les ambitions que lesdites daces y portent.

Que les tailles fussent remises en l'ancien taux du taux du bon Roy S. Louys, sauf toutesfois en cas que besoin fust, assembler le peuple, comme anciennement, pour accorder ce qui seroit remonstré & necessaire.

Et pour degager l'estat des charges auxquelles il est impliqué, nonobstant tant de leuees, fussent esleus & nommez hommes capables & de probité esprouuee, par deuant lesquels ceux qui auront manié & geré les finances & coffres du Roy puis vingt ans, seront tenus compter & faire voir l'employ. Les grands appennages & dits donnez aux enfans qui ont repudié les successions de leurs parents & donateurs, declarez affectez aux comptes & contreuenants, les rendre pour l'acquit des restats auxquels ils se trouueroient tenus en plusieurs autres articles tendants à reformation d'un si grand desordre.

A present que l'Ancre qui surchargeoit la nef qui n'en auoit besoing, au contraire nuisoit & causoit des vagues est hors, Dieu a tout reconcilié; Toutes choses sont par vostre sacrée & infuse du Ciel clemence pardonnées, tout reüny & attaché d'affection à vostre seruice.

Reste la voix de vostre peuple appellée voix de Dieu (SIRE) qui tend à la deliurance & re-

mise de son Aduocat jmbu & preparé de ses pleurs & merite de sa cause, contre ceux qui le veulent engloutir & raurir son bien sous vostre autorité, qui craignent que la verité & les larrecins qui se font en vos finances ne parroissent, ce rayon de vostre Soleil ny penetre, que ce si pretieux sang ne soit respecté comme il merite, ne se rende entremetteur de vous & vostre pauvre peuple, qui vous est donné de Dieu pour en vser, vous fournir tout, & faire tout ce qui luy est mandé de vous, jaoit que n'entendiez qu'il soit ainsi foulé aux pieds comme autant creature de Dieu que ceux qui vous veulent le faire ietter à desespoir, ja exploré & forcé à se donner luy-mesme des imprecations. Imprecations dangereuses, que si elles passent deuant vos sacrées oreilles estouppées par flateries, elles pourront monter à leur Createur.

S I R E, que vostre tant digne manteau ne serue de couuerture à tels pernicious actes, si vous voulez cognoistre le mal qui se fait, les extorsions qui se commettent sur vostre pauvre peuple, escoutez-le, ne luy laissez serrer la gorge, comme on le desire, de peur que ne l'oyez en ses iustes plaintes, ou il sera contraint luy-mesme plustost que tant languir, prier que tout à coup on le paracheue, on luy lasche la massuë sur la teste.

Quoy ! vn si petit nombre qui ruine aura-il pouuoir de tout faire perdre le reste qui essaye de vous enrichir & contenter.

Croira-il tousiours que ses meschancetez surpassent les biens, prieres & clameurs d'un si grand nombre que le reste de vos subiects.

Croira-il tousiours tenir vos saintes aureilles

estouppees: Ne iuge-il point que quoyqu'il tarde vous aurez memoire comme à l'instar du detestable parricide de Henry le Graud, Monseigneur de Neuers nanty de commandement sur vne si grosse armee de tant de finances & munitions de guerre, humblement vous vint trouuer & tout représenter, contre les tentations, & aduis qui luy furent faits & donnez.

Tous Messeigneurs vos Princes suiuant l'intention de leurs peres qui ont fidelement seruy vos predecesseurs applaudirent vostre couronnement, & ont faict ce qui leur a esté possible pour maintenir vostre estat, sans espargne de leurs biens & propres personnes, contribuerent à vostre saincte & desirée alliance de mariage, cōme il vous pleut, sous laquelle vous auez recogneu qu'il se ordissoit d'estranges & dangereuses menées, n'eust esté leur opposition & le remede que y auez adiousté.

Croira-il que vous n'aurez memoire du travail que Monseigneur de Neuers se donna à l'accommodement fait à Loudun des leuees faictes pour s'opposer aux desseins tant ouuerts de celuy qui ne les a sceu taire, ny cesser de poursuivre, si bien qu'il en a esté terrassé par vostre iustice.

Croira-il que Dieu ne face bien cognoistre que quand il a donné l'heur à Messeigneurs vos Princes d'estre les plus proches de vous, il les a dauantage obligez & rédus comptables de vous en leurs corps & biens, & fait naistre l'occasion ces derniers iours, pour vous en faire voir l'essay en laquelle ils n'ot feint à cōsōmer de leurs biens

souffrir de grandes pertes, & hazarder leurs propres personnes, pour vous maintenir cōtre ceux qui cuidoient raur vōstre Estat couuerts de vōstre manteau, pour autoriser leurs meschans desseings & suppositions de crime de leze Maïesté, pour leur donner apprehension & crainte qui n'ont peu dicter en leur genereux courages.

Ne croira-il pas que Dieu vous a inspiré de voir & penetrer leurs cœurs vrayement François, entourez de vos fleurs de Lis & d'affection, bataillant contre ceux qui vouloient enleuer vōstre Couronne par leurs emmiellemens, nonobstant lesquels & tous ostacles qu'ils vous eussent apposez, vous avez, dis-je, miraculeusement penetré dans leurs cœurs.

Vous avez aussi miraculeusement penetré dans les cœurs de ceux qui vous trompoient par leurs persuasions, & boucher aux chefs desquels vous auiez adiousté vn bon frein.

Croira-il pas que vous aurez memoire comme à l'instant dudit parricide il commença à courir sur vōstre pauvre peuple, & ruiner ce que Dieu vous a donné, ce que vous aimez, quand ce ne feroit qu'à cause du donateur, & que si promptement vous ne l'avez visité, puis qu'il a pleu à Dieu qu'à present vous tenez le gournail de cette nauire que vous voudrez veoir ce dont elle est chargée, si tout y est asséuré & chacun y fait son deuoir.

Dieu permit que le Lazare son amy mourust, s'asséurant qu'il auoit pouuoir de le faire reuiure

Sire

SIRE, vous avez permis tant d'inconueniens passez, ayant les mains liees, vous asseurant de vostre pouuoir vn iour maintenant que vous l'avez de leuer les miseres de vostre pauvre peuple, que vous en avez le pouuoir : Faictes lé donc, si ne le faictes, il est à Dieu, qui vous en a donné l'vsufroi, s'en est reserué la disposition au fonds, comme vous scauez tresbien le tenir en fief de luy, & qu'il en est le Seigneur dominant.

SIRE, vous ne voulez estre comme vn iuge, qui pour faire tort à vn pauvre desnieroit audience à son Aduocat qui scauroit ses sectets, les particularitez & ruses de sa partie feroit emprisonner voire perdre ledit Aduocat.

Vostre pauvre peuple, SIRE, n'a iamais peu trouuer personne qui sceut les ruses & meschancetez de ceux qui l'affligent cogneust tant les miseres où il est & eust plus d'affectiō à en faire remonstrances à vostre clemence que Monseigneur le Prince. Mais ses ennemis, les vostres mesmes, de vostre estat, & de vostre pauvre peuple l'ont empesché desirās continuer à s'enrichir & le ruiner, afin que la richesse soit pour eux, la pauureté pour vous. Vous serez le Roy de ces riches tant qu'ils pourront prendre, puis feront comme d'autres, s'en irons en pays estrange où ils font transporter vos finances, ne serez plus Roy de tels riches, mais des pauvres qu'ils auront despoillez.

Aussi cette Royauté sur eux ne vous profite: car ils ne font que prendre, sans vous secourir si auiez affaire, sinon d'un telon sur vne pisto-

le degage. Et vostre pauvre peuple fait ce que voulez, le met sous le pressoir luy mesme pour vous recognoissant biē qu'il vous a esté donné par le Ciel & espere à present qu'estes absolu qu'en ferez estat, à cause qu'il est don du Ciel, qu'il vous est recommandé par les exemples & traictemens de feu Henry le Grand à qui Dieu l'auoit fait iustement escheoir avec tant de hazards de sa personne nonobstant toutes oppositions & traueses, & qui vous l'a laissé calme en ayant chassé le feu & le sang qu'il y auoit trouuez.

Gardez vous, SIRE, de prodiguer ce si beau joyau & don de Dieu, faiçtes en estat a cause de la qualité du donateur, à cause que ce don se dispose a tout ce qui luy est commandé de vous à cause du merite de son obeyssance, il scait assez & peut comme la Magdeleine dire que si nonobstant ses offences cause de ses maux Dieu vous eut inspiré de plustost prendre vous mesme son gouuernement & administration, comme ayez fait il n'eust tout paty, il n'eust tant soffert mais il scait que vous auez le pouuoir de le resusciter, le releuer comme auez commencé par le moyen des odeurs de vos fleurs de lys & iustice qui auoit causé treueur aux autres, lesquels a present s'essayent dauantage & tant qu'il leur est possible que ne penetriez aux affaires, ne voyez ou n'entendiez la cause du mal, afin qu'il perde ce grand nombre de creatures que Dieu vous a donnees autant faiçtes à sa semblance & à luy aussi cheres qu'eux comme ra-

cheptees d'un mesme prix de son precieux sang.

Lesquels recognoissant bien que vostre pauvre peuple n'a personne qui soit tant imbu des memoires de sa cause que Monseigneur le Prince, & que personne, à cause de sa qualite, ne doibt à son preiudice entreprendre vous les dire que luy, quand il y auroit quelqu'un qui les scauroit, que non, craignant que ne les receussiez de luy craignant la trame de l'ordissure qu'il auoit obtenue de vous, la conuocation des Estats affin de reformer les cinq principaux points susdits & qu'un iour à cette saison esperee & desiree par vostre pauvre peuple, vous rendriez absolu & par son organe les plainctes viendroient à vous.

Le moyen pour l'empescher ne leur a manqué & à vostre insceu abusant de vostre autorité non seulement le firent mettre en l'arrest, mais depuis l'ont publié mort afin d'estouffer l'esperance de vostre pauvre peuple, ne se souciant s'il n'estoit Roy ny Prince & le desirant mesme comme ils ont fait cognoistre par leurs desseins tant descouuertes & a present recognoissant qu'il a esté conserué, vous voudroient imputer la peur qu'ils ont de sa liberté, vous voudroient faire croire qu'il pourroit se ressentir de cet arrest, qu'un homme seul vous doit faire tremeur disans comme la Magdeleine, qu'il y auoitja quatre iours que son frere estoit au tombeau il rendroit de mauuaises odeurs: qu'il y a quatre foist trois mois qu'il est en l'arrest, il put, se faut bien garder d'ouurir le tombeau de la Bastille il

rendra de mauuaises odeurs, il rendra quelques effects de vengeance.

Au contraire comme le Lazare au lieu de rendre de mauuaises odeurs resuscita confirmé entierement en la foy, & en confirma beaucoup; Ainsi Monseigneur le Prince renaistra & viura a vostre seruice, confirmé comme plus obligé de luy auoir donné la liberté que ne luy auiez ostee.

Nostre Seigneur ne s'arrestant aux propositions de mauuaises odeurs assuré de son pouuoir, fit ouurir le tombeau. Ne vous arrestez (Sire) aux paroles de tels ses ennemis, mais cheminez hardiment à cette liberté, assuré de vostre puissance, de son ame, & de l'obligation que acquerez encores, luy donnant la liberté qui luy auoit esté ostee, par autre, sous vostre auctorité, & fait cognoistre que cet arrest ne vous agreoit, par les colloques & visites ordinaires de long temps, esperance de son eslargissement à vostre pauvre peuple, qu'il supplie enuers vostre clemence & bonté Royale & naturelle, a quoy il ne voudroit auoit songé s'il n'y recognoissoit vostre contentement & son soulagement, & par vostre diuine prouidence & adiugé de vostre saint Conseil, sçachant assez qu'il est l'enclume sur laquelle toutes choses doiuent estre battus.

N'auiez vous pas (dire) l'exemple de monseigneur le Côte d'Auuergne qui a aussi receu de vous le bien de liberté, que ne luy auiez ostee, qui y auoit plus de temps estre detenu deuoit donc rendre plus de mauuaises odeurs des resentimens.

Que si ces flatteurs l'aymoient autant qu'ils le redoubtent, s'il eust voulu se ioindre a leur caballe, forligner de son debuoir & ne l'eussent recogneu de vostre sang, il n'eust esté mis encet arrest, il en fust hors, ils ne prescheroient qu'il fust à craindre en sortant. Quand il auroit de la vengeance, il scait assez que cette entreprise ne fut de vostre aduis, que Dieu ne vous auoit encores inspiré de prendre vous mesme le gouuernement de vostre Royaume, mais que eux qui fomentoient l'vsurpation de vostre auctorité, le firent faire, & comme les loups pour plus facilement rauir les troupeaux se sont ruez premierement sur le chien fidelle sentinelle s'asseurant que, l'ayant osté le berger ne peut estre par tout.

Et à present ils s'essayent vous emporter par leurs suasions à craindre vn homme seul, celuy qui se sent trop heureux d'estre vostre parent, & auquel comme tel & de vostre sang y a plus d'assurance que en tant de flatteurs quand ils vous aymeroient, car l'obligation d'amitié & de sang est beaucoup plus forte que la seule d'amitié, par infinis exemples mesmes de parens ennemis qui aux occurences ont quitte leurs amis pour leurs parens. Si ces flatteurs gaignoient, ils feroient qu'au lieu que celuy est vn bon-heur don du Ciel d'estre vostre parent, en loüer Dieu & receuoir du contentement, il en receuroit du desplaisir, & mettroit vne desfiâce perpetuelle entre les sainctes parentelles & alliances.

Ils crient que deuez craindre vn homme seul, vous qui estes si puissant que Dieu vous a faict

aymé & honoré de tous Messigneurs vos Princes, Ducs, Pairs, & officiers & de toute vostre France, & redouté de vos voisins, n'ayez de peur spécialement où il n'y a du subiect, car ce n'est vostre naturel qui estes & donnez liberalement lieu aux cœurs qui n'experimentent la peur, & plus mal font ceux qui la vous prechent.

Puis vostre pauvre peuple croira & pourra dire comme la Magdelene (Sire) si vous fûsiez plustost arriué ainsi que Dieu nous en a à present donné la grace, nous n'eussions tant paty vous nous eussiez ouy par nostre Aduocat, l'on ne nous l'eust osté, l'on ne luy eust clos la bouche, vous nous aimez trop pour prendre opinion de desnier nous ouyr, nous oster le porteur de nos pleurs, & diminuer vostre propre sang, nostre manutention.

Quand vous aurez ouy vestre pauvre peuple en sa supplication il ne sera plus accusé de l'execrable peché d'ingratitude par mes Seigneurs vos autres Prinsees: Ducs & Pairs d'auoir à sa requisition assisté son aduocat, le Ciel mesme n'en murmurera son aduocat ne s'en plaindra de voir abandonné par celuy qu'il auoit sous vostre permission, & comme vostre aymé cher peuple embrasser, pour le faire ouyr de vous son souuerain seule cause que ses ennemis luy ont procuré cet Arrest.

Peut estre (Sire) attendez vous si vostre peuple aura le ressentiment & aymera ceux qui luy font bien, aymera vostre sang, doncques comme il a causé cet Arrest que ses prieres causent

la liberté enuers vostre clemence , & vous verrez changer ces pleurs en louanges , comme à la surrection du Lazare vous naistre telle creance de force , courage & de bonnaireté que toute la terre dauantage vous en redoubtera & benira & le Ciel vous applaudira.

Mais (Sire) il y a telle apprehension que les plaintes de vostre pauure peuple viennent à vos sacrees aureilles que nuls Imprimeurs n'en osent mettre sur la presse , nul les ose porter n'y presenter : Ne les reiettez (Sire) telles qu'elles vous pourroient arriuer , quoy que mal polies & dictées , comme par vn peuple triste , affligé & despouillé de partie de ses sens par la spoliation de ses biens. Mesmes quand les plaintes feroient desquisees pour essayer de paruenir à leur but , a vostre presence excusez ceux qui en escriront sous quelque subiect que ce soit & quelques termes qu'ils y adioustent , outrez peut estre de passion de vous voir tranquile. Sans vous arrester a ce qu'il font cognoistre desirer que les refusez & qu'e'lles montent au Ciel , au seigneur dominant , afin qu'il en arriue quelque malheur pour s'entretenir dans les troubles , mais pour l'empescher Sire escoutez vostre pauure peuple comme auez commacé il est temps , vous mettrez vostre Estat en seurété & vostre France en tel repos qu'elle aura liberré de continuer a prier Dieu tout puissant qu'il vous en cōserue & aux vostres a iamais le iuste gouuernail tant qu'elle soit representee au grand iugement deuant son createur par vous & les vostres. Ainsi soit-il.

Enseignement de cette Allusion.

Le pauvre Auteur ignorant ayant rencontré vn sien amy de son ancienne cognoissance, qui a cause qu'il estoit vestu de soye sur soye encore que ses mains sentissent tousiours la poix vouloit faire le mescognu : informa de luy les principaux points de cette allusion qui lui fit responce que a present il estoit esleu & constitué en plusieurs beaux offices seigneur d'icy, Seigneur de la, & s'il n'auoit des lettres il auoit des tiltres & que quand il seroit ordonné que chacun semestast du mestier qu'il scauroit bien faire il n'y auoit esleu ny autre officier en France qui r'habillast mieux des souliers que luy & luy fut replique par l'auteur que ou il y auoit beaucoup de tiltre, il n'y auoit tant de lettres, ne laissa de dire pourtant que nostre Seigneur estoit la Majesté diuine.

Le Roy la Majesté humaine.

La Magdeleine pechereffe pœnitente,

Le peuple pecheur penitent.

La Magdeleine honteuse s'adresse aux Apostres fauoris de Dieu pour le prier.

Le peuple s'adresse a Monseigneur le Prince son proche & fauorit pour estre ouy.

Pendant le retard de nostre Seigneur le Lazare meurt.

Pendant que le Roy n'vse de son autorité, le peuple pâtit, Monseigneur le Prince emprisonné.

Le Lazare amy de nostre Seigneur.

Mōseigneur le Prince dufang & fauory du Roy.

La mort du Lazare cause douleur a Magdeleine.

L'em-

l'emprisonnement de Monseigneur le Prince
douleur au peuple.

Nostre Seigneur n'arriue qu'après la mort du
Lazare.

Le Roy n'entre en son autorité qu'après l'em-
prisonnement de Monseigneur le Prince.

La surrection du Lazare est esperée a l'arriuee
de nostre Seigneur.

La liberté de Monseigneur le Prince est esperée
du Roy entrant en sa puissance.

Nostre Seigneur promet que le Lazare ressus-
citera.

Le Roy donne esperance par les colloques &
visites de la liberté de Monseigneur le Prince.

Le Lazare est de quatre iours au tombeau.

Monseigneur le Prince quatre fois trois mois
en l'Arrest.

Le tombeau.

La Bastille.

Nostre Seigneur ne craint les mauuaises odeurs,
proposées

Le Lazare estant son amy & ayant aussi pou-
voir de le changer.

Le Roy ne craint les ressentiments proposez de
Monseigneur le Prince comme de son amy, &
ayant pouuoir de les dissiper.

Le Lazare n'a rendu de mauuaises odeurs par-
ce que Dieu le fit reuiure estant tout puissant.

Monseigneur le Prince ne rendra de ressenti-
ments parce que le Roy luy donnera s'il luy
plaist la liberté sous sa puissance.

La surrection du Lazare la rendu plus assuré
en la foy de nostre Seigneur comme ayant ex-
perimenté sa toute puissance.

La liberté de Monseigneur le Prince le rendra plus obligé & assuré au Roy, comme la tenant de sa seule clemence.

La surrection du Lazare donna ioye à Magdelene, à ses parens, amis & à l'assemblée.

La liberté de Monseigneur le Prince donnera ioye au peuple.

De la surrection du Lazare nostre Seigneur acquit grande creance de sa puissance & clemence

De la liberté de Monseigneur le Prince, naistra au Roy grande creance de sa puissance & de sa clemence.

La surrection du Lazare attriste les Iuifs ennemis de nostre Seigneur.

La liberté de Monseigneur le Prince attristera les ennemis de sa Maïeste.

Et dit outre ce r habilleur metamorphosé, qu'il auoit acquis ses offices & seigneuries par arget. En ce il n'estoit question recevoir des gages de diners offices & coucher vne partie deux fois en signe de despence; il se faillloit adresser à ceux qui auoient acquis leurs offices & seigneuries par lettres & merites, pour en tirer d'auantage. Et le venant a enquerir desdits poincts de ceste allusion, estoit signe, que l'Auteur estoit apprentif vn apprentif excusable puis qu'il se recognoissoit que la crainte & l'apprehension qu'il n'arriue mal a ce si Sainct & Sacré Oingt de Dieu & le zele qu'il auoit a la Frâce, l'auoient a ce poullé plustost que sa capacité, que neantmoins a ces premiers bouillons il se iugeroit, si ceste source estoit vn peu libre & ouuerte, il en sortiroit de bonnes eaux. F I N.

